



Jingle ertönt, Moderatorinnen erscheinen, beide schieben gemeinsam einen Babywagen vor sich her.

(Applaus des Publikums)

Helga Merci vellmol...

Hella ...danke...

Helga merci...

Hella Willkommen zo Härmann ond Härter, chorz «Hä?!», de fräche Wochetalkshow.

Helga Nome ächt ond einzigartig mit de Hella Härter...

Hella ...ond de Helga Härmann.

Helga D'Wält isch voll vo verrockte Gschichte – zom Glöck! D' Sändig «Hä?!» isch wieder of d' Suechi gange ond hett i dem chaotische Huufe os Presse- ond Agenturmäldige gwüehlt...

Hella ...ond isch fündig worde.

De Inhalt vo de höttige Sändig isch so ongläublich, dass mer s'Gfühl überchonnt, mir vom «Hä?!» händ en sälber erfonde.

Helga Was natürlich absolute Blödsinn isch.

Die ongläublich Gschicht spielt sich in Amerika ab. A de Ostküste, e Stond weg vo Boston, befindet sich s'idyllische Städtli Gloucester. 30'000 Iwohner, d'Stadt direkt am Meer, streng katholisch, s'Wasser suber, türkisfarbig. Of de erscht Blick ned grad de Usgangspunkt för en ongläublich Gschicht.

Hella Aber wie so oft, entdeckt mer d'Riss i de Fassade erscht bim zwoite Mol äneluege. Höchi Arbeitslosigkeit, wenig Industrie, wenig Tourismus. Zuekonftsussichte för d'Iwohner sind ned grad rosig, vor allem ned för die Jugendliche. Aber wie's so isch: Not macht erfenderisch. A dä Satz händ sich 17 Jugendlich am College vo Gloucester erinneret ond beschlosse, uszbräche. Aber wie, das erfahrid mir jetzt grad sälber vo eusem erschte Gast.

Babygeräusche aus dem Kinderwagen.

Helga

Ond will euse erschti Gascht noni vell meh als das cha säge, händ mir au sini Mueter id Sändig iiglade. Do isch die erscht 16-jährigi Alisha Joli! Herzlich willkomme!

Alisha kommt herein, geht zum Kinderwagen, nimmt das Kleine heraus und setzt sich zu den zwei Moderatorinnen.

- Helga Alisha, ich has grad gseit, erscht sechzähni ond scho Muetter vonere zwoimonatige Tochter. Nid grad wie mer sich s' Läbe vonere 16-jährige Teenagerin vorstellt.
- Alisha Scho ned. Aber ich find's guet.
- Helga Sie vermissid s' alte Läbe ned? De Uusgang zom Biespiel oder s' Shoppe mit de Kolleginne?
- Alisha Ganz verzichte muess ich jo ned. Ab ond zue luegt mini Mam zo de Chliine. Ond dor de Tag bin ich i de Schuel, wo ich die Chlii im Hort chan abgäh. Miin Alltag hett sich ned total verändertet.
- Hella Aber ohni d'Onderstötzig vo Ihrere Mueter wär's schweriger?
- Alisha Ohni mini Mam wär's sehr schwierig.
- Hella Alihsa, sechzähni, ufgwachse in Gloucester, Sie händ's is College gschafft... ond denn en Schwangerschaft. Eifach ned ufpasst?
- Alisha Äxtra ned ufpasst.
- Hella Äxtra ned upasst? Mit füzähni?
- Alisha Werom ned?
- Helga Das bruucht jetzt aber en Erklärig.
- Alisha Agfange hett die Sach mit de Betty Klein. Sie isch ei Klass obe a mir im College gsii. Ich weiss no, wo sie vor de WC Tör erbroche hett, mir alles öber d'Schueh. Zerscht ben ich mega hässig worde ond ha sie zäme gschisse, denn hett sie sich entscholdiget ond mir gseit, werom dass sie sich hett müesse öbergäh.
- Hella Will sie schwanger gsii isch.
- Alisha Richtig. Ond denn han ich ihri ganzi Schwangerschaft meterläbt ond won ich ihres chliini Baby zom erschte Mol im Arm gha han, do han ich gwösst, das wott ich auch – ond zwar glii.
- Helga Trotz allne Problem, wo das mit sich bringt.
- Alisha Es Baby id' Wält setze isch bestimmt s'chliinere Öbel als de Nochber ombringe oder abglöscht vor em Burger King z'hocke, oder ned?
- Helga Aber denn hätted Sie elei chönne schwanger werde, s'Chind öbercho und fertig. Aber Sie händ sich öppis ganz anders öberleit.
- Alisha Ich ha dänkt, die Idee vomene Chind isch so genial ond eifach, do gfinsch sicher no anderi, wo das au guet finde. Ond so isch es denn au gsii.

Moderatorinnen gehen nach vorne

- Hella De Wäg vo eim Baby zomene ganze Chindergarte isch nömm wiit gsii.
- Helga Schnulleralarm?
- Hella Schnulleralarm!
- Aber wies dezue hett chönne cho, dass plötzlich 17 Schülerinne schwanger worde sind, händ eusi Kollege vom US-Sender CTV i eusem Uftrag versuecht use zgfende.

Beitrag „**Teenager_schwanger**“ wird per Beamer auf die Leinwand eingespielt.

Helga En gheime Pakt also sell gschlosse worde sii?
 Stimmt das wöcklich oder esch es eifach en schrägi Idee vom e
 Journalischt?

Hella Wer chönnt eus do dezue besser Uskonft gäh, als die drü beschte
 Fröndinne vo de Alisha. Do sind d' Sunny, d'Electra ond d' Jessy.
 Herzlich Willkomme!

Die drei neuen Gäste kommen herein, alle sind hoch schwanger. Die vier Jugendlichen begrüßen sich herzlich.

Hella Nämid Sie bitte Platz.
Mer händ im Biitrag ghört, dass anschiinend en gheime Pakt sell gschlosse worde sii ond sich 17 Schüelerinne dem agschlosse händ. Stimmt das wörklich?

Electra Das mit em Pakt stimmt scho.
Sunny Vielleicht ned grad en Pakt, das tönt so noch Verschwörig.
Jessy En Club simmer, meh ned.
Electra De TMC, de Teenager Mother Club.
Hella Wie genau isch es denn zo de Gröndig vom TMC cho?
Alisha Ich ha mine Fröndinne vo minere Idee verzällt, ganz eifach.
Sunny Ich weiss no, ich bi grad vom Fussballtraining hei cho, do händ d'Alisha, d'Jessy und d'Electra vor de Huustör of mich gwartet. Zerscht han ich dänkt, jetzt isch öppis passiert, aber denn händ's mich is Starbucks iiglade ond mir vo ihrere Idee verzellt.

Helga Sie sind also gmüetlich bimene Kafi gsässe...
Electra ... bim ene Frappuccino...
Helga ... bim ene Frappuccino, äx güsi, ond händ öbers Muetterwerde gredt.
Jessy Ond zwar voll konkret.
Ned, wie die andere i de Pause am College: Mis erschte Chind wird David heisse, ich finde die schwarze Baby die süessichte, ich wett am liebschte Zwilling... ond all das Gedödel. Nei! Voll konkret.

Hella Ond das heisst?
Jessy A) Wenn han ich mis Chind?
B) Vo wem han ich das Chind?
C) Wer wird vo wellem Chind Gotte.

Helga Ond Sie drüü sind sich scho vor em Träffe mit de Sunny enig gsii?
Alisha Zweek Stönd vor dem Träffe händ mir of em Spielplatz am Hafe omelödet ond ich han ihne vo minere Idee verzällt.
Jessy Zerscht händ mir gmeint, es seg es Schpel, aber wo d'Alisha plötzlich vor eus hegstande isch, ond vo eus en Schwur verlangt hett, händ mir gschnallt, dass sie's ernscht meint...
Electra ... ond sind voll druf i gschtige.
Das isch voll igfahre. Wenn ich einisch sett berüemt werde ond en Biographie über mis Läbe schriibe, denn wörd ich säge, noch dem Schwur bin ich erwachse gsii.

Hella Ond am Obig im Starbucks?
Sunny Zerscht han ich gar nüt begriffe.
Alisha Auge wie ne Frosch hesch gmacht.
Sunny Isch doch keis Wonder. Aber je länger mir gredt händ, desto klarer isch mir worde, dass ich i mim Läbe au öppis wott verändere ond es Biespill för en neu, muetigi Generation wott sii.

Jessy Yes, we can!
ALLE 3 Yes, we can!
Helga Ihre Leitspruch?
Electra Genau.

Helga
Electra

Mir händ eus a dem Obig de Barack Obama ond Betty Klein zo eusne Vorbilder gmacht. D' Betty hett a eusere Schuel...
... es Chind übercho. Das hett d' Alisha bereist verzellt.
OK.
Also, d' Betty hett öppis gwogt, was die meischte sich gar nie getrauid. Mit sechzähni es Chind überzcho ond allne z' säge, dass es beschte isch, was ihre hett chönne passiere. Ich meine, sie hätt's jo chönne abtribe ond niemer hätt öppis devo gmerkt. Sie hett stolz ihre Buuch zeigt ond jetzt chonnt sie jede Tag mit em Schesewage i d' Schuel. Das bruucht Muet!

Sunny
Alisha
Jessy

Totali Charaktersach!
Ond no am gliiche Obig händ mir euse Club gründet.
De Teenager Mother Club, TMC.
De TMC isch de weltwiit erschti Club, wo usschiesslich för Schwangeri onder 18 gründet worde isch.

Sunny
Helga
Sunny
Jessy
Electra
Alisha

De Biitritt isch nor mit eme positive Schwangerschaftstest möglich.
Ond d' Idee dehinder?
Dänk zäme Spass ha, Ultraschallbildli ustusche...
... Tips gäge s' Erbräche gäh, Babysache-Katalög aluege...
... Schnäpplittips wiitergäh ond natürlich Frappuccino trinke!
Mir vier treffid eus jede Mäntigobig im Starbucks. Mir händ au scho gseid, TMC bedüti Teenager Monday Club.

Hella
Alisha
Electra

Das tönt, als wär s' Schwanger-sii s' Normalschte vo de Wält.
Isch es au.
Aber scho ned immer.
Mit de Jungs zom Biespiel isch es mega härzig. Die wänd eim die ganz Ziit über de Buuch streichle.
Die sind vell netter als soscht.
Ond zom Spicke isch es vell eifacher worde.
Inwiefern?
Du muesch eifach säge, dass es dir schlächt isch. Denn darfsch use ofs WC, det luegsch in aller Rueh de Spick a, gohst wieder is Zimmer zrogg ond schriibsch uf, was vorhär ned gwösst hesch.
Aber Sport mache chasch nömme, das vermiss ich.
Ond rauche darfsch nömme.
Überhaupt set mer immer en Huufe Gmües ässe ond Salat ond Vollchornzüügs. Was mir mini Muetter för Sache chochet – ond s' meischte han ich überhaupt ned gärn.

Die beiden Moderatorinnen stehen auf und wenden sich ans Publikum.

Hella

Mir vom «HÄ?!» verlönd de Ässtisch, denn eus interessiert vill meh, wie sich die Gschicht noch de Gründig vom TMC i de Schuel wiiterentwicklet hett.

Helga

Insgesamt 10 Schüelerinnen händ sich bereit erklärt, die Gschicht fürs «HÄ?!» exklusiv z' reflektiere ond Usschnitt drus z' zeige.

Hella

Spöter i de Sändig gönd mir de Frog noch, was denn die zuekünftige Vätere vo dere Sach halte. Mir vom «HÄ?!» händ's gschafft, fuf vo ihne is Studio z' bringe.

Helga

Ond öpper darf i dere Sändig natürlich ned fähle, de Dr. Sommer. Of de gratis Nomere 0800 800 888 beantwortet de Dr. Sommer vo jetzt a exklusiv brennendi Froge rond oms Thema Sexualtiät ond

Hella

Schwangerschaft. Drüü Froge vo Arüefer werd id spöter i de Sändig direkt beantwortet.

Do nomol d'Nommere vom Dr. Sommer: 0800 800 888.

Jetzt aber tauchid mir ii i die letschte 12 Mönat Teenageralltag am College in Gloucester. Vill Vergnüege.

Story, Teil 1

Szene 5A: In der Pausenhalle

5'

Pausenhalle, wenige Tage nach der Gründund des TMC.

Miley Ond? Was hesch gha?
Sarah (gelangweilt)
5,5, ond du?
Miley 4,1.
Mann, wie machsch du das immer?
Sarah Was?
Miley Die guete Note dank.
Sarah Ich weiss au ned? Passiert eifach.
Miley Passiert eifach. Ich böffle wie blöd, hocke Stonde vor dem Seich und bi der passiert's eifach.
Es get Täg, do wett ich mis Läbe mit Lüüt wie dir tusche.
Sarah Mach das ned!
Miley Wieso ned? Wär doch super!
Sarah Mis Läbe isch total de Ablöscher, ich säg dir's. Netti Eltere, wo immer und für alles Verständnis zeigid, chome alles über, won ich wott, i de Schuel kei Problem, es findet mich alli nett, ich werde bewonderet, blablabla. Es isch eifach alles soooo elend langwilig!
Miley Ich fänd's spannend, wenn s'langwilig wär.
Sarah Jede Tag Sonnenschiin isch voll nervig!
Miley Jede Tag Räge schloht vill meh of d'Luune.
Sarah Tüsch di ned.
Miley Min Vater hockt sett 2 Jahr im Chnascht, d' Mueter schleickt jede ander Tag en neue Typ hei, suuft, raucht, ond ich bi verantwortlich, dass ihre guet goht. Das schliift extrem!
Sarah Aber du hesch doch dini pensioniert Lady, wo dir s'ganze Schuelgäld zahlt.
Miley D' Miss Helden. Aber sie isch ned mini Muetter ond au ned min Vater, verstohsch. Jede Tag bi mer isch e Fahrt ofere Achtibahn.
Kimberley Hoi zäme.
Darf ich?
Miley Bitte.
Sarah Do isch scho bsetzt!
Kimberley Sorry.
För d' Amy?
Sarah Logisch.
Kimberley Die redt no mit de Alisha vom 2B. Also.
(will gehen)
Miley Hei, Kimberley. Was hesch du gha im Tescht?
Sarah En Sechser.
Kimberley Wieso weisch du...
Sarah ... will's of dinere Bagge stoht, Miss Oberschlau.
Kimberley Wo?
(reibt sich die Wangen sauber)
Miley Sarah!
Kimberley, das isch doch ned ernscht gmeint.

Kimberley Ah! Sorry. Aber ich ha wöcklich en Sechser gha. Konjugatione vo französische Verbe find ich ned schwierig.

Sarah Jo was. Aber weisch was du schwierig findsch ?

Kimberley Was?

Miley Hör uf, Sarah!

Sarah En Fröndin z'gfinde – oder en Frönd. Aber wahrschinlich verbietet dir das din Chilechor. Es chönnt jo öppis passiere!?!
Hey, Amy!

Amy Hoi zäme.
Kimberley? Was machsch denn du do?

Kimberley Ich ha grad welle goh. Sorry.

Amy Nei, wart no. Ich muess eu öppis voll krasses verzelle.

Sarah D'Amy hett weder emol es Gschichtli. Isch dini Muetter wieder nackt go demonstriere?
Viel extremer!

Amy Vori hett mi d' Alisha vom 2B aghaue, ihr wössit scho, die wo...
... jede Mittag Risotto isst.

Kimberley Genau die. Mir könnid eus vom College Filmclub. Chonnt doch die zo mir ond seid so, dass ich die voll spontani, perfekti Superfrau vo dere Schuel bi ond so.

Miley Stimmt doch.

Amy Finsch, echt?

Miley Voll.

Kimberley Spontan of jede Fall. Du seisch doch immer: «Yesterday is history, tomorrow is mystery, today is a gift.»

Sarah Note Sechs, Miss Willis.

Amy Klar, mis Läbesmotto! Geschter isch die gross Bekannti, Morn isch die gross Onbekannti, s'Jetzt isch die einzig Variabli! Nor of die hesch Ifloss.

Sarah Verzell wiiter.

Amiy Jetzt hett doch d'Alisha mit es paar Fröndinne, wo do i d'Schuel göhnd, en Club gründet, de TMC.

Miley TMC?

Kimberley Teenager Mother Club.

Amy Wieso weisch jetzt du das?

Kimberley Das Gröcht goht scho sett es paar Täg ome.

Amy Es isch im Fall keis Gröcht. Die händ sich vorgnoh, no i dem Schuljohr schwanger z'werde ond mich gfrogt, ob ich ned au wett mitmache.
Schwanger z'werde?

Miley Mit sechzähni?

Sarah Wieso ned?

Amy Aber mit em Läbe sell mir doch ned spele.
Denn spell du mit dine Barby-Puppe.
Ich find's voll de Hammer. Wenn der vorstellscht, dass im Buch plötzlich en chliine Mönsch wachst und du erläbsch das. Voll geil.

Kimberley Das chasch doch au no spöter.

Amy Läbsch nome jetzt...

Sarah ...Zuekonft isch die gross Onbekannti. Schnallsch es, Kimberley?

Miley Das heisst, du machsch mit?

Amy Ned nor ich?

Miley Wer de no?

Amy Ihr dank au.
Sarah Mir?
Miley & Kim. Mir?
Amy Wär doch ächt de Kick!
Miley Ich ha scho gnueg Kick de ganz Tag. Mir langet's.
Amy Aber es Chind verändertet s'Läbe, Miley! De Blick richtet sich of
 einisch ofs Wesentliche ! Alles isch wieder im totale Flow. Dini
 Muetter gseht wieder en Sinn im Läbe, din Vater...
Miley ...wörd mis Chind erscht gseh, wenn's achti isch.
Kimberley Mich donkt das gföhrlich.
Sarah So nes Vorhabe isch au ned för Schisshase dänkt. Do bruuchst Lüüt
 mit Födle!
Amy Lüüt mit Födle, wie d'Betty Klein.
Sarah Die wo Muetter worde isch for zwee Mönet?
Amy Genau die. Sie isch s'Vorbild vom TMC.
Sarah Die isch wörklich cool.
Amy 100%.
Miley Jäh, bisch du debi, Sarah?
Sarah Voll. Das holt mich ändlich os mim Winterschlof. Soscht überläb ich
 die Pubertät nie. Ond du?
Miley Ich muess mir das no überlegge.
Amy Hesch no Ziiit bisch am nöchschte Samstag. Denn get's es Träffe am
 alte Hafe, am achti am Obig. Ich goh of jede Fall. Ond d'Alisha
 hett mir gseit, Fröndinne ond Glichgsinnti sind herzlich willkomme.
Sarah Voll krass!

Die Schulglocke klingelt.

Miley Mir müend.
Sarah Ou nei, Gschicht, wie langwiilig.
 Ond gliich. Irgendwie han ich's Gfühl, s'erscht Mol sälber Gschicht
 z'schribe.
Amy Es goht mir ned andersch. Voll de Kick!

Die drei gehen Arm in Arm ab, Kimberley bleibt alleine zurück. Sie schaut ins Publikum, beginnt zu weinen und rennt den anderen hinterher.